

Imballasgi in cera d'apa, pè falla finita cù u plasticu

Eccu un'idea chì garberà di sicuru à quelli chì sò impignati in a lotta contr'à u plasticu. Sottu à denominazione commerciale di « Oca Nera », un'apicultrice stallata in Funtanone prupone da pocu un pruduttu chì li permetterà di falla finita cù issi filmi tralucenti o cù a carta d'alunniu ch'omu pone nant' à i stuvigli, prima d'infugnalli in u frigoferu.

Di cosa si tratta? D'imballasgi riutilizevuli fatti cù a cera di l'ape. Di prim'accattu, a ricetta pare semplice: un mischju di cera è di

tissutu soffice abbastanza da piglià a forma d'ogni biscottu, cazzarola, cuppetta, plattu... Basta à lavà l'oggettu cù appena d'acqua tepida è di sapone da riutilizallu à voline più.

« *L'idea m'hè venuta consultendu pagine Instagram d'apicultori americani chì prupunianu prudutti simili, spieca Caroline Chaumet, a criatrice. Ma pè ghjunghje à u mischju ideale di cera, rasgina di pinu è oliu, m'hè toccu à sbrughjà a di per mè è mi c'hè vulsutu un certu tempu.* »



A ricetta : tissutu untu d'un mischju di cera, oliu è rasgina VIRGINY AIELLO

« Travaglià sempre cù prudutti lucali »


A pruduzione hè principiata in u 2019, à partesi da a cera colta in a centinaia di bugni di a sfruttazione chì Caroline hà messu in ballu cù u cumpagnu. Un'iniziativa commerciale ch'ùn si pò staccà di a dimarchja ecologica più generale difesa da issu coppiu di giovani apicultori. « *Ghè un prugettu chì ghè in cuerenza cù u nostru prugettu di vita, palesa a criatrice. Vilemu convinche a ghjente di riduce a so cussumazione di plasticu. Circhemu dinù di travaglià sempre cù prudutti naturali è lucali. Adupremu a nostra cera più pura, oliu di cotza pruduttu in Francia ecc.* »

A pruduzione, pè avà, resta mudesta: 3 o 400 pacchetti à l'annu distribuiti in qualchi buttea di l'isula.

« *Ghè un oggettu chì piace è chì si vende bè, si ralegra l'apicultrice. Ma per ora, di più ùn possu pruduce. Facciu tuttu à di per mè è l'affare mi piglia assai tempu. Ne puderebbi fa di più s'èiu avessi una macchina per misurà è taglià i tissuti.* »

Una tappa, in u sviluppu di a pruduzione, chì si puderebbe presentà à bon ora. Ecologichi è ancu bellucci, l'imballasgi di Caroline Chaumet, hè sicura, e putenzialità à l'annu.

P. N.



Caroline Chaumet, apicultrice stabilita in Funtanone, prupone imballasgi riutilizevuli fabricati à partesi da a cera di e so ape. DOCUMENTU CORSE-MATIN